

NUMISMATICA

Aruba Coin Club
Nelson L. Ras

NUMISMATICA a derivá di e palabra latino "NUMISMA" cual di su vez a originá di esun griego "NOMISMA" y cual ta significá: "moneda" o "locual ta sancioná pa ley."

"NOMIZEIN" ta significá sancioná y "NOMOS" ta ley, pues literalmente "NUMISMATICA" ta: ley di moneda y ta encerrá e estudio completo di moneda y di otro objetonan relacioná cu moneda manera medalla, token, jeton, mereau, patterns, primitive money, etc. etc. E hobby di coleccioná moneda a surgi desde e glorioso epocanan di Atenas y Roma na unda nan tabata diseña piezanan artisticamente demostrando asina nan gloria y poderío. Siglonan a pasa, glorianan a cay y otronan a nace e hobby di sigui coleccioná moneda a crece y awe e ta algo entusiasta, interesante y sobre todo constructivo y educativo. Naturalmente cu e estudio di un moneda ta exige bastante tempo y pa piezanan difícil pa catalogá ta indispensable un ayudo profesional. Estudio di un moneda ta consistí primeramente door di obtené entre otro: origen di e pieza, motivo di su diseño, cantidad cuña di tal moneda, razon di su circulacion, materia di e pieza y algo cu ta di sumo importancia ta e qualificacion di un moneda, pues e estudio ta encerrá un resumen completo di tal moneda.

Mayoría vez no ta nada facil pa realíz tur e detallenan mencioná y ta necesidad di cada numismatico pa ta poseé materialnan pa tal trabao. (buki-revista-catalogue-corant. etc.) Un dedicacion profundo y e factor "smaak" di parti di e coleccionista lo haci e tarea mucha mas agradable. Si una vez ta existi e "smaak", lo ta riparable e placer o satisfaccion cu ta acompaña a lo largo di nan progreso cada coleccionista.

E tema di un moneda ta algo sumamente precioso, interesante; e pieza por ta di oro o di carton pero e locual e tin di conta nos ta algo cu talvez hopi no tabata sabi.

Cada moneda sin excepcion algun, ta reflejá un parti di e cultura o e historia di e propio nacion o region o ciudad, dependé di e origen di e pieza.

Y ta pesey ta e meta di tur coleccionista, pa por relatá e significacion di cada un o aunque sea di algun di su monedanan.

Ta un experiencia grandi ora cu un simple moneda ta contabo e recuerdo di un armisticio firmá riba tal fecha o e angustia di un guerra cu nan ta conmemorá. Moneda ta varia di tamaño, di denominacion, di forma, di materia, enfin den diferente sentido, pues ta logico cu ta existí un variedad enorme di coleccioná.

E coleccionnan mas comun ta: serie, type, medalla, topico, conmemorativo, sets y diferente sistema más.

Un nota interesante y verdad ta cu ningun coleccionista por alcanza e maximo di su meta sin e ayudo ne-

cesario di otro colega numismatico. Numismatica ta pa un y tur, pa rico y pa pover, pa tur esnan cu ta interesa y cu ta aprecia e "sciencia" o "arte" di numismatica.

Antes di e siglo pasá e tabata un hobby di tur rey, kendenan tabata tin e lugo di por intercambia "cara" (moneda) cu otro, pero awendia tur persona por permintí nan mes cu un coleccion numismatico pa medio di ofertanan y cantidad di casnan commercial y especializá den e ramo aki rond mundo. Ta pa e motibo ey di e creciente interes pa cu numismatica cu awor e hobby ta ser reconocí como e "rey di tur hobby."

Ta sigui den e proximo edicion)